



I 100 ani de la "Campionaria"



La xe nata in te 'l giugno 1919, in te 'l centro de Padova, ne la Sala de la Ragione e ne i cortili de la Fiera Bestiame in Prato de la Vale. Vardèlo el manifesto in rosso co na bela dona che atrae i concitadini e i possibili visitatori de altre regioni, magari anche quei stranieri, perché in Italia la xe la prima Fiera in assoluto, edizioni che anche sto ano la se vedi colorada de rosso.

A festegiarla ghe xe tute le persone inportanti, ma ghe ne manca dó: el presidente de la Region, Zaia, e la presidente del Senato, Casellati. Ghe xe la senatrice Roberta Toffanin, el sindaco de Padova, Sergio Giordani, el presidente de la Provincia, Fabio Bui, el presidente de la Camera de Comercio, Antonio Santocono e el dot. Olivieri, el Retor de l'Università, Consilieri comunali, i responsabili de le Forze de l'Ordine e de l'Esercito e altri onorevoli cittadini.

Per i 100 ani de la Fiera i ospiti vien ricevudi non più in te la Sala Carraresi, tropo lontana da l'ingresso, ma nel padilion n. 2, apositamente trasformado: da una parte el palco per le autorità, da l'altra tanti bancheti, veramente un poco scomodi per tuti i altri. Ma va ben cussi, perché semo vizini a l'ingresso e sto logo sarà ancora dedicato a la cucina. La Fiera varda al futuro: non più presidenza francese, ma interessi de la zità, de la provincia, de la region, de l'Italia intiera.

Démoghe na ociada a i vari padilioni: el n. 1 xe dedicato al shopping; una parte del n. 2 xe dedicata a la grande accoglienza de le autorità e el resto a i Alimentari, in union co 'l padilion n. 3. El n. 4 ofri uno de i 100 percorsi in Campionaria e dentro ghe xe anche la "Casa di Europa". El n. 5 mostra na roba nova 'sai importante: "Villaggio dei bambini e Fattorie didattiche". Cò passemo al n. 7, vizin del n. 6, trovemo un mare de automobili de tute le razze, mentre la galeria n. 8 xe dedicata al Turismo.

Al n. 11 chitare e pianoforti; al n. 14 domina el Sport e el xe ben afolado. Per finir, el n. 15 un golosesso per chi ama le idee e le "innovazioni tecnologiche".

A la giornata de la cerimonia conclusiva de la Fiera de Padova xe finalmente rivada la presidente del Senato, Maria Elisabetta Alberti Casellati, vestida de bianco e con i oci pieni de dolcezza ma insieme severi. E con ela, el sindaco Giordani, Fabio Bui, Antonio Santocono e tuti i altri del giorno de l'apertura. Adesso però no i se ga da dimenticare de la bela musica de un coro, no cantada in forma gueresca ma, dirìa, con modulazioni quasi familiari e con na ripresa finale. "Bisogna guardare al futuro" disi la presidente Casellati, "con intrapprendenza e fiducia nelle proprie capacità."

Una setimana, questa, (31 magio-9 giugno), in cui Padova xe stà meritoriamente protagonista de un senario nazionale e internazionale, con giornade ricche de avvenimenti che ga coinvolto la citadinanza e i ospiti venudi da tuto el mondo, per visitare la Fiera e scoprire "le bellezze delle nostre terre."

Luigi Perini

Le autorità insieme con la Presidente del Senato, Maria Elisabetta Alberti Casellati. (foto L. Perini)

